

CANTUN GRISCHUN: Centrala grischuna da donnas

I mantga veaple igl sustign finanziel

(comm.) caschung dalla sessiun d'otgover ò la Centrala grischuna da donnas anvido las deputadas da tot las parteidas agl giantar tradiziunal. Durant chel giantar vignan mintgamai dadas infurmziuns cun en tema actual. Igl tema da chest onn è sto: «Cunsegliazioni per lavour e professiun - quo vadis?»

La mia ampresa cunaschienscha cun la Centrala grischuna da donnas vaia fatg a caschung dallas elecziuns da deputos/adas igl 2014. Tot las candidatas scu er las suppleantas da mintga circuit, èn neidas preschentadas cun en pèr curtas indicaziuns sen la homepage dalla Centrala grischuna da donnas. Ord chel muteiv vaia er do suatientscha all'invitaziun agl giubileum «75 onns Centrala grischuna da donnas». Differentas donnas on tignia en pled festiv – ed ia va ma dumando, pertge tgi vegia anc mai santia da chella organizaziun cun tal angaschamaint e per part perfign cun pitschnas revoluziuns?

Ins canoscha anc dei betg tot...

Aint igl frataimp digls dus davons onns vaia pero constato, tgi saveir ensatge dalla purscheida dallas pi individualas instituziuns è ena tgossa. Ins ò forsa svelta ligia en artetgel, pansond tgi chegl pertotga betg la nossa regiun – e gio è tot puspe svania da noss radar. Antras la participaziun ainten la cumischung da furmaziun e cultura, vaia piglia part a differentas reuniuns cun igl facit e la constataziun, tgi chella pitschna part digl Grischun numno Surses, vign menziunada fitg rar. Chella vign mianc marcada cun igl pi pitschen punctign sen las folias. Per me è chegl mintgamai sto en gnoulet frustond, vasond sen la carta digl Grischun chella mancanza.

Va angal ia chel manco d'infurmaziun dalla vasta purscheida? Na, siva digl referat digl mez otgover aint igl Center da sanadad Savognin SA, vaia constato tgi la populaziun è stada surstada da chella pussebladad da far dumondas u da nizzigier la pussebladad d'ena consultaziun tar ena instituziun adattada, per retschever sen chella veia en ageid personal.

Tge fò la Centrala grischuna da donnas?

En per datas fundamentalas da chella organizaziun: la fundaziun dalla Centrala grischuna da donnas è stada igl 1. d'avregl 1939. Dalunga

è chel post nia fitg activ sen igls pi divers sectors: organizaziun digl sarvetsch militar auxiliar da donnas; ampren post da cunsegliazioni da consuments; inoltro la dumonda per l'erecziun dalla scola da donnas; post d'intermediaziun per tgirunzas da tgesa; fundaziun d'en post per cunsegliazioni giuridica; furmaziun d'en comite per igl dretg da votar dallas donnas; elecziun dall'amprema derschedra per giuvenils; votaziun per igl madem dretg per om e donna; curs da lungatg ed integrazioni per migrants; fundaziun digl post d'incasso d'aliments, fundaziun dalla tgesa da donnas ed anc bler, bler oter.

Igl prancepi dalla cunsegliazioni è ageid per alla fegn saveir sa gidar a sasez. La Centrala da donnas porscha cunsegliazioni individuala e personala per om e donna. Graztga agl sustign

per dumondas d'egualitad. Igl cunsegl federal conceda sustign federal ad instituziuns privatas per la cunsegliazioni ed infurmaziun da donnas ainten la veta professiunala scu er per promover la reintegrazioni da donnas ainten la veta professiunala siva digl taimp da famiglia. Scumanzo ò chel post cun 12 persungas tgi on tschartgea cunsegl, chegl cun ena tariffa da 20.- fr. l'oura. Dantant ègl ossa ca. 130-160 persungas, surtot donnas, tgi consulteschan igl post spezialiso. Per cliaint vignan impundeidas ca. 3-4 ouras e chella consultaziun costa 100.- fr. l'oura, chegl vot deir schinavant tgi igl cliaint è er bung da paer las expensas. Igl 2015 on 128 persungas fatg adiever da chella purscheida. Radond 427 consultaziuns (personalas, per telefon u an scretg) èn neidas fatgas.



(da san.) Cathrin Räber-Schleiss, presidenta centrala da donnas grischun, Annetta Simeon, lic.iur., dipl. fed. FA donna digl rom an dumonda da sierenzas socialas, mediatoura AFM, Silvia Hofmann, stada: manadra digl post da stab per egualitad dallas schanzas dad om e donna digl cantun Grischun (ossa coaching e cunsegliazioni).

dalla confederaziun, digl cantun, digl martgea, da fundaziuns ed interpresas, on chellas purscheidas tariffas favorevlas. Da donna Annetta Simeon, vainsa survagnia ena survista ed ena vista actuala.

Igls divers posts da cunsegliazioni

Igl 1997 è nia fundo e nia finanztgia cun daners dalla confederaziun igl post da cunsegliazioni

per lavour e professiun porscha ageid nunbirocratic e professiunel tar problems e dumondas davart la lavour, igl dretg da lavour, igl dretg d'assicuranza sociala, mobbing, disparitad da paia, molestas sexualas ed otras furmas da discriminaziun agl post da lavour.

Ena buna lavour da reit communabla cun oters posts publics da cunsegliazioni èn evidents.